



Broj: 01,02,03,03/11,04/2-05-1-766/23
Sarajevo, 26. 6. 2023.

KOLEGIJU PREDSTAVNIČKOG DOMA PSBiH

KOLEGIJU DOMA NARODA PSBiH

KOLEGIJU SEKRETARIJATA PSBiH

**DELEGACIJI PARLAMENTARNE SKUPŠTINE BiH U
INTERPARLAMENTARNOJ UNIJI**

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 27-06-2023

Organizaciona jedinica	Klasifikaciona oznaka	Redni broj	Broj priloga

B

IZVJEŠTAJ Maroko, Marakeš, 13 – 15. juni 2023. godine

Predsjedavajući Predstavničkog doma i predsjedavajući Delegacije Parlamentarne skupštine BiH u Interparlamentarnoj uniji Denis Zvizdić, Ermina Salkičević-Dizdarević, članica Delegacije Parlamentarne skupštine BiH u Interparlamentarnoj uniji, i Mladen Bosić, član Delegacije Parlamentarne skupštine BiH u Interparlamentarnoj uniji, s pratećom delegacijom prisustvovali su Konferenciji IPU-a o međuvjerskom dijalogu koja se održavala u Marakešu od 13. do 15. 6. 2023.

Predsjedavajući Predstavničkog doma Parlamentarne skupštine Bosne i Hercegovine (PSBiH) i predsjedavajući Delegacije PSBiH u Interparlamentarnoj uniji (IPU) Denis Zvizdić i članovi Delegacije PSBiH u IPU-u Ermina Salkičević-Dizdarević i Mladen Bosić prisustvovali su otvaranju i panelima na Konferenciji IPU-a o međuvjerskom dijalogu u Marakešu, Kraljevina Maroko.

Konferenciji su prisustvovali predsjednici i članovi parlamenata, vjerske vođe, predstavnici civilnog društva i drugi stručnjaci.

Konferenciju je otvorio predsjednik IPU-a Duarte Pacheco i rekao: "Svi se jednim glasom možemo založiti za solidarnost, umjerenost i uključenost. Možemo zagovarati bolje poštovanje ljudskih prava. Danas mi činimo nešto historijsko na prvoj parlamentarnoj konferenciji o međusobnom i međureligijskom dijalogu."

Konferenciju su zajednički organizirali IPU i Parlament Kraljevine Maroko, a pod visokim pokroviteljstvom NJ. E. kralja Mohammeda VI.

Tokom trodnevne konferencije parlamentarci, vjerski lideri i predstavnici civilnog društva iz cijelog svijeta učestvovali su u panel raspravama o vladavini prava, te miru i inkluziji.

Također, bilo je riječi i o promoviranju regionalnog i globalnog mira kroz međuvjerski dijalog, zajedničkom radu parlamenata i vjerskih lidera na promoviranju dijaloga, a razmijenjene su i informacije i dobre prakse o saradnji parlamenata s vjerskim zajednicama i organizacijama, o ulozi parlamenata i vjerskih lidera u promociji rodne ravnopravnosti, ulozi mladih u društvu i u borbi protiv govora mržnje i podsticanja na nasilje.

Konferencija IPU-a u Marakešu završila je usvajanjem Deklaracije na visokom nivou o saradnji parlamenata i vjerskih zajednica u izgradnji mostova prijateljstava između naroda i država, kao i u promociji prava i osnovnih sloboda u funkciji izgradnje pravednijih i kohezivnijih društava.

Predsjedavajući Predstavničkog doma PSBiH Denis Zvizdić sastao se s predsjedavajućim Predstavničkog doma i predsjedavajućim Doma savjetnika Parlamenta Kraljevine Maroko Rachidom Talbijem Alamijem i Enaamom Mayarom i čestitao im na izvrsnoj organizaciji konferencije.

Tokom sastanka Zvizdić, Alami i Mayara su istaknuli da Bosna i Hercegovina i Kraljevina Maroko imaju dobre bilateralne odnose i da postoji interes dvije države za jačanjem saradnje u brojnim oblastima.

Saglasili su se da u narednom periodu treba unaprijediti međuparlamentarnu saradnju razmjenom iskustava između dva parlamenta. Ukazali su na značaj i na mogućnost saradnje dvije države u oblasti ekonomije, posebno u sektoru obnovljivih izvora energije u kojoj Kraljevina Maroko ima veoma dobre rezultate i pozitivna iskustva, te u oblasti turizma gdje postoji značajan prostor za saradnju u dijelu razmjene znanja i iskustava, uspostavljanja bezviznog režima i povećanja turističkih posjeta između dvije zemlje.

Predsjedavajući Zvizdić pozvao je predsjedavajuće Parlamenta Kraljevine Maroko da dođu u posjetu Bosni i Hercegovini i Parlamentarnoj skupštini BiH i istaknuo da će to osnažiti odnose između dvije zemlje.

Izvještaj odobrio

Predsjedavajući Predstavničkog doma PSBiH i predsjedavajući Delegacije PSBiH u IPU-u

Dr. Denis Zvizdić

Izvještaj pripremila

Dženana Leper

Stručna savjetnica za bilateralne odnose i zamjenski sekretar Delegacije PSBiH u IPU-u

Sektor za međunarodne odnose i protokol

Dostaviti:

- naslovu
- Sektoru za međunarodne odnose i protokol